



KAKO JE NASTALO SUNCE

SIGURNO SI ČUO RAZNE PRIČE O TOME KAKO JE NASTALO SUNCE. SIGURNO MISLIŠ DA SU TE PRIČE TAČNE I ISTINITE. ALI SADA ĆU TI OTKRITI TAJNU, KOJU SAMO ODABRANI ZNAJU, SAMO PRAVI SRETNICI.

U DALEKOJ GALAKSIJI SIJALE SU TRI ZVIJEZDE. BILE SU SESTRE I POŠTO SU STALNO BILE JEDNA UZ DRUGU, NJIHOV SJAJ JE UVIJEK BIO POSEBAN, NEKAKO NAJBLISTAVIJI U ČITAVOJ GALAKSIJI. IMALE SU NEOBIČNA, ALI BAŠ LIJEPA IMENA – MER, HU I NISA.

MER JE JAKO VOLJELA MALE ZVIJEZDE. UŽIVALA JE U TOME DA IH NAUČI, KAKO ŠTO BOLJE DA SJAJE. TRUDILA SE DA IM OBJASNI DA TREBA DA ISKORISTE SVAKU ISKRU KOJU NOSE U SEBI I DA SVAKU VARNICU PRETVORE U BLJESAK. ZVJEZDICE SU SA RADOŠĆU SVJETLUCALE PORED NJE I NASTOJALE DA BRILJIRAJU KAKO BI JE ZADIVILE.

HU JE VOLJELA RED. BILA JE POZNATA PO SVOJOJ ORGANIZACIJI I DISCIPLINI I NIKOM NIJE DOZVOLJAVALA DA JOJ TO REMETI. NISI MOGAO NAPAMET LETJETI KROZ GALAKSIJU I SVIJETLITI GDJE TI MISLIŠ DA TREBA DA SVIJETLIŠ. NE, HU JE VODILA RAČUNA DA SVE BUDE UREDNO I PRECIZNO I ZBOG TOGA JE SVE TAKO HARMONIČNO FUNKCIONISALO.

NISA JE VOLJELA ZABAVU I SMIJEH. ZA DOBRU ŠALU JE UVIJEK BILA RASPOLOŽENA, A SMIJALA SE ŠIROKIM OSMJEHOM I VEOMA ZARAZNO. KADA JE ONA ZRAČILA DOBRIM RASPOLOŽENJEM SVI OKO NJE SU VESELO ISIJAVALI. TU JE ZAISTA BILO VEOMA PRIJATNO BORAVITI.



JEDNE SVJETLOSNE GODINE, ZVIJEZDA PADALICA, KOJA JE STALNO PROPADALA U DRUGE GALAKSIJE PA SE VRAĆALA, JE VIDJELA DA OGROMNA, LEDENA KOMETA BEZGLAVO JURI KA NJIHOVOM NEBU I PRIJETI DA SVE RAZVALI. PLANETE SU POČELE DA PODRHTAVAJU OD STRAHA, METEORI SU SE UZVRTJELI, A SVE ZVIJEZDE SU POČELE USPLAHIRENO DA TREPERE.

MER SE ZABRINULA ZA SVOJE ZVJEZDICE, HU SE UŽASAVALA HAOSA KOJI JE NADOLAZIO, A NISI TA VELIKA, PRAŠNJAVA KOMETA UOPŠTE NIJE BILA SMIJEŠNA. ZNALE SU DA SU NAJMOĆNIJE KADA SU ZAJEDNO I ODLUČILE SU DA TU SNAGU UPOTRIJEBE.

ZAGRLILE SU SE ČVRSTO, ČVRSTO, KAKO SAMO SESTRE UMIJU. SVA NEBESKA TIJELA SU ZADIVLJENO POSMATRALA KAKO NJIHOVA LJUBAV POSTAJE MOĆNA, UŽARENA SILA, KAKO SVJETLOST POSTAJE SVE VEĆA I TOPLOTA SVE JAČA. NEOČEKIVANO, PRIJATNI TALAS JE POČEO DA SE ŠIRI GALAKSIJOM. POSTEPENO JE ZAGRIJAVAO I OBASJAVAO SVE OKO SEBE, PRENOSIO MIR I SIGURNOST.

KAKO SE PRIBLIŽAVALA GALAKSIJI, LEDENA KOMETA SE U SVOM LETU OSIPALA I TOPILA, I NA KRAJU, KADA JE STIGLA TAMO GDE JE NAUMILA DA NAPRAVI RŠUM, PRETVORILA SE U PAR ZRNACA PIJESKA KOJE JE ZVIJEZDA PADALICA JEDNIM IZDISAJEM RASPRŠILA.

SESTRE SU OSTALE ZAGRLJENE JER JE, JEDNOSTAVNO, TAKO SVIMA ODGOVARALO. ONE SU BILE POTPUNE I ISPUNJENE, UŽIVALE SU U TOM ZAGRLJAJU, A SVI OSTALI SU SE TOLIKO NAVIKLI NA NJIHOVU TOPLITU I SVJETLOST, DA NISU MOGLI NI ZAMISLITI DA POSTOJE BEZ NJIH.

TO TI JE PRAVA ISTINA.



E SAD, KAŽU DA SVAKIH PET SVJETLOSNIH GODINA, SESTRE ODJEZDE NEBOM DO NOVIH ZVJEZDICA, PLANETA I METEORA KOJIMA SU NJIHOVA TOPLOTA I SVJETLOST POTREBNI, KOJE TREBA NAUČITI

DA SIJAJU, KOD KOJIH JE POTREBNO UVESTI RED, A PRI TOME SE I DOBRO ZABAVITI.

KAŽU I DA ONI OD KOJIH SE SESTRE UDALJE UVIJEK BUDU DUGO TUŽNI I NIKAD NE ZABORAVE NJIHOV BLISTAVI SJAJ I OSJEĆAJ SIGURNOSTI KOJU TA POSEBNA TOPLOTA I SVJETLOST DONOSE, ALI VREMENOM NAUČE DA POSTOJE SAMOSTALNO.

I UVIJEK BUDU NAJBOLJA NEBESKA TIJELA, NAJJAČE SIJAJU, NAJBOLJE SE VRTE OKO SVOJE OSE, ČAK SE I SVE PADALICE NAJBRŽE VRATE NA SVOJE MJESTO I TRUDE SE DA NE PADAJU ČESTO.

ETO, SLJEDEĆI PUT KAD TE POMILUJE SUNCE PO OBRAZIMA DA ZNAŠ DA SU TO MER, HU I NISA.

ALI NEMOJ OKOLO TO PRIČATI, RECI SAMO ODABRANIMA.

V-1
GENERACIJA 2019/2020.